

沈雲龍編輯

明清史料彙編

初集

第六冊

文海出版社印行

明清史料彙編初集目錄

第六冊

蜀碧	清·彭遵泗撰	二六七五
條奏疏稿（附續刊）	清·蔣伊撰	二八九三
寧海將軍固山貝子功績疏	清·闕名撰	二九八九
內閣小識（附內閣故事）	清·葉鳳毛撰	三〇五三

蜀

碧

欽定四庫全書提要

蜀碧四卷

國朝彭遵泗撰遵泗字磬泉丹稜人乾隆丁巳進士官翰林院編修是書紀蜀亂始末及一時死節士女其曰蜀碧者取萇宏之血三年化碧意也起明崇禎元年戊辰至我

朝康熙二年癸卯未有附記及楊展劉道貞鐵腳板余飛等傳其書大旨以沈雲祚稱獻逆殘蜀由風俗之惡故爲此書備書死難者姓名以雪斯恥而

體例冗雜如載桐城二老事與蜀事無關又如賊
夢梓潼神以宗弟紅柬來謁諸事亦太涉神怪也

敘

蜀碧者哭蜀也哭蜀者所以著楊嗣昌之罪而憫邵捷春之愚以弔忠魂烈魄於地下也蜀之險甲天下絕其要塞雖百萬可立挫焉賊一入寇秦良玉扼之向非賂陳奇瑜脫去則賊之亡久矣嗣昌委賊於蜀夫人知之而捷春不知也撤夔萬之藩籬守重慶之門戶使賊得以出入縱橫而無所忌此其罪在誰哉故曰哭蜀者所以著楊嗣昌之罪而憫邵捷春之愚也獻賊之三入蜀也分道屠戮流血成川蜀之受禍極矣當是時自縉紳

以至氓庶盡節者不可勝數而閨中婦女或閉戶自焚
或罵賊以死者無算也戎馬倥偬其事不必盡傳傳者
又莫由表述筆之於書使後之君子得以考之則死者
可以無憾故曰哭蜀者所以弔忠魂烈魄於地下也曩
者余嘗論其大略特未暇詳今余弟磬泉採擇成編頗
爲詳悉是固余之志也嗚呼蜀非有深怨積怒於賊也
而殘忍若此天實爲之耶抑人事使然耶覽是集者必
將有歎息泣下而不能已者已故曰蜀碧者哭蜀也樂
齋彭端淑序

自敘

史氏丹溪生憶甲申遺事而歎曰嗟乎自古殘忍之賊
亡甚獻忠遭禍之烈亦未如明季之蜀者也蜀自獻藩
啟封世有令嗣休養生息幾三百年士民之庶物力之
饒甲乎天下其間雖經鄆藍播蘭之亂元氣猶存故張
逆一入旋即敗歸未大創也崇禎十年闖賊直犯成都
西北半壁攻無堅城十三年而獻又繼之蜀始隳脆焉
原其故文燦受紿於房穀其走挺矣嗣昌督師於荆襄
其毒流矣捷春拒諫於石柱其隘通矣士奇遏糧於守

軍其遮撤矣嗣是陷夔門破梁萬走榮貴敗曾英血染
佛圖炮穴重慶瑞王君臣駢首就戮當是時使蜀藩之
志果於拒賊監軍之餉得請卽行其能保有成都乎不
能也腹心旣潰而求全於首領難矣獨怪獻逆據蜀後
僭號稱帝不思收拾人心而處心積慮成乎其殺匏奴
死雪鰥死貫戲死刳腹死邊地死士盡矣及匠傭男盡
矣及婦女民盡矣及僧道人盡矣及犬牛物盡矣及兵
卒又焚其殿碎其砌毀其屋埋其井平其城二年之內
積骸如山流血成川而賊之逞毒一日封刃其心不樂

也由前言之四方是維天子是毗誰司兵柄萬死莫贖
由後言之天方薦瘥喪亂弘多浩劫之來自有宿也故
西充授首而後多門之死不可勝悼矣夫考古之籍推
蜀之由張儀之啟疆公孫之躍馬譙縱之迫脅李特之
流亂劉闢之狂慙王建之發跡知祥之踵據王珍之草
竊爭城奪地創霸圖王而皆撫有蜀民不敢荼毒何獻
之肆惡一至此耶獍虎嗜人不識好惡獸心野性固與
人殊也論者謂獻逆僭號蜀人不與誅斬所置郡守牧
令蓄怨積怒激而成兇嗚呼此正蜀人之所以死乎余

幼時固聞獻逆遺事厥後博採羣書凡當時忠臣烈士
節女義夫可印證者彙爲蜀碧一編以俟之後是日也
慘然操觚悲風四起余壹不知心之所極泪簌簌然而
屢下也壬戌八月朔五丹溪生磬泉泗自敘

種種破敗種種屠戮數十年喪亂情事括於一敘之
中故足爲此書之弁而文筆則挾嗔憤而含鳴咽矣
蔡修萊跋

目錄

一卷

起戊辰崇禎元年止癸未

二卷

起甲申

世祖章皇帝順治元年止本年十二月

三卷

起順治二年乙酉止順治四年丁亥

四卷

起順治五年戊子止

聖祖仁皇帝康熙二年癸卯

附記十五條

楊展傳

劉道貞傳

鐵脚板傳

余飛傳

書周鼎昌殺賊事

後敘

蜀碧卷一

丹溪生彭遵泗磬泉編述

起戊辰
止癸未

戊辰

崇禎元年冬十有二月陝西賊大起○陝西連歲大
禡平涼延安間飢民相聚爲盜首亂者王子順苗美
張聖姬三兒王嘉胤黃虎小紅狼一丈青龍得水混
江龍掠地虎上天猴闖王孟良劉六等名目甚衆督
撫討之久無成功其後併小爲大李自成張獻忠虎
視鴟張秦楚豫蜀之間戰無堅陣攻無堅城肝腦塗

中原而明社屋矣

丹稜學博何修云天啟間蜀大旱遵義守令集黃
冠禱雨拜章者伏地彌日及起守詢之云上帝召
天下都城隍議事章出甚遲問議何事云戰場始
於陝西至崇禎初年秦中賊果起○修明季遵義
人

巳四川地大震○是後不書四川所紀皆蜀事也

庚午辛未

壬申

癸酉

○秦蜀二境擊柝相聞賊旣亂秦蜀豈無知而瞿塘劍閣間不聞修邊備實軍儲袖手以待賊入何與備敘歲次痛當事無陰雨之憂也

甲戌敘州母猪洞銅鼓鳴聲聞一晝夜

○二月流賊張獻忠始自楚犯蜀○獻忠陝西膚施人本將家子少時從軍犯法得總兵陳洪範救免刻梅檀爲洪範像事之其爲賊也與羅汝才同起獻忠身長而瘦面微黃鬚一尺六寸僂勁果俠軍中稱爲黃